



Հովհաննես Թուխանյան

Ձախորդ Փանոսի հեքիաթը

Ժամանակով մի աղքատ մարդ է լինում, անունը՝ Փանոս: Ինքը մի բարի մարդ է լինում, բայց ինչ գործ որ բռնում է՝ ձախ է գնում: Դրա համար էլ անունը դնում են Ձախորդ Փանոս: Ունեցած չունեցածը մի լուծ եզն է լինում, մի սել ու մի կացին:

Մի օր եզնիքը սելում լծում է, կացինը առնում գնում անտառը փետի: Անտառում էս Փանոսը միտք է անում, թե մի բան, որ ծառը կտրելուց ետը մին էլ նեղություն պետք է քաշեն, ահագին գերանը գետնից բարձրացնեն, գցեն սելի մեջը, ավելի լավ է՝ հենց սելը լծած բերեն ծառի տակին կանգնեցնեն, որ ծառը կտրեն թե չէ՝ ընկնի մեջը:

Ասածն արած է:

Եզներով սելը բերում է մի մեծ ծառի ներքև կանգնեցնում, ինքը անցնում վերի կողմը, կացինը քաշում թրրխկ հա թրրխկ: Շատ է քաշում թե քիչ, էդ էլ ինքը կիմանա, ծառը ճռճուլով գալիս է գարկում, տակովն անում, սելը շարդում, եզներն էլ հետը: Փանոսը մնում է ապշած կանգնած: Ի՞նչ պետք է անի: Կացինը վերցնում է ու ծոծրակը քորելով ճամփա է ընկնում դեպի տուն:

Ճամփին մի լճի ափով անց կենալիս է լինում: Տեսնում է՝ մեջը վայրի բաղեր են լողում: Ասում է՝ գլուխը քարը, չեղավ, չեղավ, արի գոնե մի բաղ սպանեն, տանեն տամ կնկանս: Ասում է ու կացինը պտտում, շարտում դեպի բաղերը, որ մինն սպանի . բաղերը ճղճղալով ցրվում են, փախչում, որը եղեգնուտն է մտնում, որը թռչում գնում, կացինն էլ ընկնում է լճի խոր տեղը, տակն անում, կորչում: Փանոսը մնում է լճի ափին կանգնած միտք անելիս: Ի՞նչ անի, ի՞նչ չանի:

Շորերը հանում է դնում լճի ափին, ինքը մտնում մեջը, որ կացինը հանի: Գնում է գնում, քանի առաջ է գնում, ջուրն էնքան խորանում է, տեսնում է՝ կարող է խեղդվել, ետ է դառնում, դուրս գալի:

Դու մի ասիլ՝ Փանոսը որ լիճն է մտնում ու խորը գնում, էդ ժամանակ լճափով մի անցկենող է լինում, տեսնում է՝ էստեղ թափած շորեր կան, եղեգնուտի մեջ խորը գնացած Փանոսին էլ չի նկատում, էս շորերը հավաքում է, առնում, գնում:

Փանոսը լճից դուրս է գալի, տեսնում շոր չկա: Մնում է տկլոր կանգնած:

Միտք է անում . «Ի՞նչ անեն, տեր աստված, էսպես տկլոր ո՞ր գնամ»:

Սպասում է մինչև մութն ընկնի: Մթան հետ վեր է կենում գնում գյուղը: Որ գյուղին մոտենում է, ասում է՝ էսպես տկլոր որ գնամ մեր տունը, տանըցիք ի՞նչ կասեն: Արի գնամ ախպորիցս շոր առնեն հագնեն, էնպես գնամ կնկանս մոտ:

Ճամփեն ծռում է դեպի ախպոր տունը:

Դու մի ասիլ՝ էդ գիշեր էլ ախպոր մոտ մեծարք կա, քեֆի էլ էն տաք ժամանակն է: Դուրը ծերպ է անում, տեսնի՝ ով կա, ով չկա . հյուրերից մինը կարծում է, թե շունն է, ձեռի կրծած ոսկորը շարտում է դեպի դուրը, ոսկորը դիպչում է աչքին, աչքը հանում:

Փանոսը ցավից վայ վայ անելով ետ է դառնում, շներն էլ ձենի վրա վեր են կենում, տեսնում են, օհո՛, մթնունը հրես մի տկլոր օքմին, ու չորս կողմից վրա են տալիս: Շների հաշոցի վրա մարդիկ դուրս են թափում, տեսնում են՝ մի տկլոր մարդ փախած գնում է՝ շները ետևից: Առանց երկար ու քարակ մտածելու վճռում են, որ կա թե չկա՝ սա սատանա է:

Բավական տեղ դշրդու տալով, հայհոյելով, հարա հրոցով ընկնում են ետևից, հալածում, տանում զգում անտառները: Շներն էլ ետևիցը մի ճուղը պոկում են, ու էսպես տկլոր, աչքը հանած, կաղին տալով խեղճ Փանոսը գնում է կորչում: Մյուս օրը գյուղում տարածվում է, թե հապա չեք ասիլ՝ Փանոսը կորել է: Գնացել է անտառը փետի ու ետ չի եկել: Գեղահավան հավաքվում են գնում . գնում են անտառը ման գալի, սելն ու եզները գտնում են ծառի տակին ջարդված, ինքը չկա,

Դեռ Փանոս, դեն Փանոս . հարցուփորձով հազուստն էլ գտնում են մեկի մոտ:

Ա՛յ մարդ, էս հազուստը ո՞րտեղից է ընկել քեզ մոտ:

Թե ախպեր, էս հազուստը էսպես մի լճի ափի վեր ածած էր, հավաքեցի, բերի:

Գնում են լճի շորս կողմը պտտում, կանչում՝ Փանո՛ս, Փանո՛ս, Փանոսը չկա:

Վճռում են, որ Փանոսը խեղդվել է:

Գալիս են ժամ ու պատարագ են անում, քելեխը տալիս: Կնիկն էլ մի քիչ սուգ է անում, Փանոսին գովում, ափսոսում . հետո մի ուրիշ մարդ է ուզում, հետը պսակվում գնում: